

摘藻堂四庫全書薈要

集部

欽定四庫全書薈要

集部

圭塘小藁卷二

臣董誥詳校

詳校官助教臣謝登雋



欽定四庫全書薈要

圭塘小藁目錄

卷一

古賦

卷二

古詩

歌行

卷三



律詩

卷四

絕句

卷五

序

卷六

記

卷七

記

卷八

記

卷九

碑志

卷十

碑志

卷十一

贊

銘

辭

卷十二

跋

題

文

卷十三

長短句

別集

卷上

詩

贊

講議

跋

銘

記

傳

序

長短句

卷下

文過集

林慮記遊

續集

墓志

歌行

圭塘十二詠

附錄

雜著

續錄

臣等謹案圭塘小藁十三卷別集二卷續集一卷附錄一卷元許有壬撰有壬字可用湯

陰人登延祐二年進士官至中書左丞卒謚
文忠有壬詩文其門人編次者為至正集又
別自輯為此稿其弟有孚錄而序之迨有壬
既沒集本遂亡而有孚所攜此本獨存因重
加編次釐為十三卷又輯嘗寄有孚詩文八
十五篇緱獻可所收文過集及林慮記遊詩
文九十三篇為別集二卷其殘編斷簡得於
倚尖野人家者為外集一卷有孚復為之序

題屠維作噩二月乃洪武二年己酉在元亡
之後矣子孫世藏其書宣德間復失其外集
至成化己丑其五世孫南康知府顥始校正
刊行而以家乘所載誌文祭文及有孚等唱
和之作編為續集一卷附之於末其後至正
集復出於世而闕佚未全今以兩書校核雖
大畧相同亦互有出入如忍經春秋經說成
中丞詩諸序雪齋書院龍德宮上清儲祥宮

河南省左右贊治堂遼山縣儒學諸記武昌

萬壽崇寧宮林州同知孫承事克呼公神道

諸碑皆至正集所無而獨見於此本又別集

中長短句為至正集未載者亦有二十三闕

其他異同詳畧甚多昔歐陽修文集之外又

有文粹黃庭堅詩集之外又有精華錄皆甄

綜別行學者亦傳習不廢此藁為有壬手訂

原本又經有孚排定視集本之晚出者較為

精詳故特著於錄以備參證焉乾隆四十三年四月恭校上

總纂官臣紀昀臣陸錫熊臣孫士毅

總校官臣陸費墀

圭塘小藁原序

故翰林學士承旨集賢大學士光祿大夫兼太子左諭
德圭塘先生許文忠公往年特命為中書左丞以不得
行志辭歸御史臺臣奏於上曰許有壬德兼體用學究
天人正色立朝誠心報主比居管轄之地益彰輔弼之
忠誠所謂臺省老成中外具瞻者也為御史中丞歸臺
臣又奏曰中丞許有壬謀猷聞望為國老成德業文章
超出時輩立朝大節歷歷可稱其在位也竭忠礪節冰

藥自持扶持紀綱表礪庶府抗論不阿於權貴嫉惡尤過於往年誠不負聖天子眷注之隆中外具瞻之譽玉音嘉納寵錫頻繁此天下之所共知初不待於劣弟之論及文章特餘事爾但平生性稟經籍外無所嗜好世俗所重可以為子孫計者悉不存於胸中昆季間恪守先公之訓而終始不渝者公一人爾故居宰路韋布不殊幾務方殷著述不廢况閒暇乎門生集錄成一百卷名至正集同年歐陽公為序可必傳者也當時翰林太

常院國子監俱移公牒各求一部貯之書庫以備徵討
以淑後學先生謙讓未遑也諸生亦繕寫工畢不韋值
先生捐館有孚亦以議禮忤時相意遷守相州道路阻
脩不知其後還送上官以遂諸公公議否昨聞猶子太
常博士楨忽遭起遣倉皇之際輕身南行書籍家貲悉
皆棄擲至正集冊帙重大必不能顧藁亦併亡使先生
平生著述淪沒無聞深可痛惜然而竊聞軍中多具眼
者斯文天相或遇知音必不毀棄苟存全集未可知也

行橐中止存昔者應酬諸人所謂圭塘小藁而有孚為
序之本章無失墜力疾編類得賦四古詩二十五歌行
十二律詩四十四絕句三十五序十八記十六碑志十
一贊五銘二辭一題跋六文一長短句六十三總二百
四十三為一十三卷酬贈及見寄有孚詩文贊議跋銘
傳記長短句共八十五為別集上緹獻可出其先世所
收文過集并林慮記遊詩文共九十三為別集下而其
殘編斷簡得於倚尖野人家者為外集一卷繼小藁後

并目錄共一十六卷以示子孫所謂存十百於一二也
嗚呼惜哉昔祭酒宋本誠夫之歿也弟顯夫以其文求
公序公極美顯夫能以其兄之文著於世傳於後可謂
能弟誠夫可謂不死今若此豈惟負父兄之訓而他日
亦何面目見友朋於地下乎況文集之外如漫錄漫總
二書又皆干係朝廷政務登載用舍人材將來足備文
獻徵考今亦喪亡視顯夫為愧尤重嗚呼天地有窮此
恨無窮也痛哉痛哉屠維作噩春二月既望弟有孚引

昔人論文章貴有館閣之氣所謂館閣非必挾藻於青
瑣石渠之上揮翰於高文大冊之間在於爾雅深厚金
渾玉潤儼若聲色之不動而薰然以和油然以長視夫
滯澁恠僻枯寒褊迫至於刻畫而細放逸而豪以為能
事者徑庭殊矣故識者往往以是槩觀其人之所到有
足徵焉本朝自至元大德以訖於今諸公輩出文體一
變掃除儷偶迂腐之語不復置舌端作者非簡古不措
筆學者非簡古不取法讀者非簡古不屬目此其風聲

氣習豈特起前代之衰而國紀世教維持悠久以化成
天下者實有係乎此也集賢大學士兼太子左諭德安
陽許公自進士高等接武而上歷侍從膺藩宣典內制
佐政府出入中外四十有餘年其牢籠萬象漱滌芳潤
總攬山川之勝與夫推之經濟當世者何莫非學其所
取數多其用物弘故其所發筆力有莫窮其倪而邐迤
曲折且不它蹈則夫冠冕佩玉之氣象信得而徵之矣
公大全集凡若干卷簡而出之為詩文樂府若干卷題

曰圭塘小藁圭塘安陽別業也公之所休逸也花竹泉石超然林壑故以命編云契生翰林學士承旨榮祿大夫知制誥兼脩國史張翥書

圭塘小藁者即至正集而不具錄者也圭塘者先生別墅也先生幼穎悟先公自教之趨庭應對詩文立成嘗侍游見古碑命往讀輒背誦以復同行驚歎謂偶然故試之始信甫冠入京名譽日起未幾擢高科登顯仕著述不廢精敏絕人門生彙為至正集歐內翰謂雄渾閎

雋不可以淺見闕有孚仕南臺見江湘間得片文隻字
十襲傳玩至有假托以銜者遐方好事不憚請求然卷
帙浩瀚諸生應酬不給有孚得先生所輯名圭塘小藁
即至正集而不具錄者繕寫以應之其居禁近省臺論
天下事凡見章疏嘉言讜論具至正集方貴顯時何求
不獲而獨留意於文翰今年七十四杜門却掃聖上念
老臣優全祿任子官俾得安閒至於親朋懇求亦有不
免孔子曰不知老之將至云爾其識趣為何如昔子由

序東坡和陶詩曰轍少而無師子瞻既冠學成先君命
轍師焉夷考其後宦遊四方中被誣斥睽離之時多從
兄之日少如有孚者不敢竊比前賢然亦承命而師三
十年不去左右開發成就固已不少而憤憤庸庸學不
加進年將耳順跼伏祠官步武且不敢仰視而況文章
道德之懿哉他日將何以見先公於地下日月逝矣雖
悔可追託名集端因以志愧至正庚子中秋弟中憲大
夫同僉太常禮儀院事有孚序

欽定四庫全書薈要卷一萬六千三百十一

集部

圭塘小藁卷一

元 許有壬 撰

古賦

迷樓賦

予總嵯政廣陵禱雷雨塘掾曹汝霖從歸途說江都廢興荒煬始末周覽山川闌闌樓居之盛而又及迷樓焉傷而賦之其詞曰

有樂不縣積塵斷絃有美不御老醜備前於是前星晦
乎其無光少海一變而為田矣天厭隋祚憂不在敵胎
於心腹成於肘腋以五子一母列據雄鎮為可恃而不
知大都偶國為禍之尤劇方荒場之好學接士也固莫
辨其真偽及其留麗華而怒高頰則惡緒已暴於中外
惜猛虎之不知竟為毛間虫之所噬黃腸甫湊金合已
賜鹿聚居廬龍飛天位弛然自放於九重之上天地萬
物無一物之可畏遂肆心於巡狩傳粉深宮笑江東之

諸帝車轍馬跡將徧九州北巡榆林既讐其酋耀兵河
右瀆武東陬引汴水開邗溝置離宮造龍舟伊江都之
勝麗詎一豫而一遊天亦厭乎我民欲一旦而盡劉百
萬億之蚩蚩乃生項昇之巧萃倖般於心匠委財幣於
電掃按圖締構不日成之璇室愧陋摘星笑卑瓊宮謝
侈阿房讓奇章華姑蘇撮土何施建章栢梁廣猶可稽
叔寶三閣華而不微軼古罔後舉莫我夷於牝靡曼於
粲珍瑰寶帳散愁而延月複室酣香而忘歸亂晝夜於

多景鬱烟霧之霏霏晶熒奪目孰辨遠邇縈紆倚足曷
明東西巢燕亦惑乎網戶車羊尤眩乎竹枝弄臣肆誤
以資笑阿監雖習而猶疑入者罔識其所從出者莫省
其所蹊一蟻逐肉林之臭一蜂憊花島之飛蠅遭拍浮
而醉不可解舟入溟濤而維無所施又如鷓鴣不能悉
鄧林之樹小鮮豈暇窮滄海之涯俊娥熟何妥之車錫
名實來夢之兒下俚稚女孰究其姓字如侯夫人之死
者蓋漫不知吁嗟獨夫心蕩神疲尚能名之可謂曰迷

昔在帝堯法宮是作舜闢四門以撤壅遏明堂政令辟
雍禮樂究我資訓德脩罔覺遠不軌與不物實儀刑之
攸託三苗羲和昏迷致兵政教不迷在書可徵威儀卒
迷詩具刺懲盤盂几杖微且有銘異哉茲樓以惡著稱
謂神仙亦迷於此地何處通突至不迷於厥行向使中
原無叛天復假齡殆將作七千五百里之臺而盡靡天
下之蒼生矣人不知過或肆無忌苟知其非敢作而遂
觀其引鏡念頭頸之且斫觀天識圖儂之將至既灼然

而自知乃確乎其自棄蓋柔終而無改過之勇厚極而
有難開之蔽迷於心者若是其大迷於樓特其細也高
岸為谷深谷為陵樓傾土平傷哉蕪城乃為之歌曰蕪
城蕭蕭兮草離離繁華漸盡兮瓦礫不遺昔之迷不可
復兮無俾世迷

弄田賦

元統甲戌有壬承乏中臺嘗與議農政因語農官上林
隙地可規治藝五穀若古弄田皇上機暇監農不易迂

而實切其說既不行且有竊笑之者噫古制之不復者
多矣豈獨是耶感而賦之其詞曰王政之大無以加於
農乎林林總總以食為天茹飲俗變稼穡興焉唐虞至
聖命稷是先蒼姬八百年之王業實基於生民之篇炎
劉去古而未遠貽謀亦慎乎其傳未央宮中不事流連
樹藝有地是為弄田謂昭帝幼冲未能親於帝籍鉤盾
近省姑試耕以為劇何考信之不覈致流傳之昧實蓋
祖宗為敦本而設雖曰遊弄而亦不忘乎稼穡也天下

之治生於敬畏目擊之頃知農夫之艱難粒米之不易
有不惕然而悟凜然而惴者乎其為美也非竒技淫巧
以戮常也非狗馬遊獵以導荒也非鄭衛哇邪以塞聰
也非妖艷靡曼以作矇也非以人為翫若董賢鄧通也
日底天廟土脉膏滋爰驅轂輶載其時糧而人立甚
險竿之岷危播而子落若淵客之珠璣人牛前逝牽石
後隨又如跳丸之飄忽走索之飛馳俄青條覆乎畦畛
何眩人之能為惡莠亂苗尤務去惡俄穎俄粟拞拞其

獲益始於舉耜而終於鉅艾莫不可翫而可樂顧俳優
之褻狎器物之不軌魚龍曼衍之鄙吞刀吐火之詭何
足以辱天視之一睨哉若稽耕籍有國大教王后供種
太史播告秉耒一墜朱紘有耀神倉鍾藏冢宰舉要所
以勸農民供齊盛而事天地與祖廟也三代共由之大
典百王不廢之要道何周宣中興之哲王乃不籍其千
畝至形號文公之譙則江東之耒暇又無足與校也開
元之盛種麥苑中太子侍登治並古隆是亦耒田之遺

意惜其有始而無終於惟我朝登三邁五南郊酌酌有
田千畝大臣代耕歲事脩舉而齋宮尚稽於享醴玉趾
未親於舉武是以奮庸之士拳拳有望於復古昔周公
之相成王也書有無逸詩有七月知稼穡王業之艱難
丕顯文承武之謨烈率婦子而親觀宜詩人之播說臣
願割苑中數畝之隙俾從事於播種備春秋之遊豫滄
未央之名美然後講三推之儀明五禮之重臣敢陋潘
岳江淹之賦復有周之雅頌也

鬪駝賦

元統甲戌九日上幸後苑觀鬪駝有壬適有奏對獲遂
一觀退而為之賦曰

于嗟乎駝爾軀孔碩爾能實多龍斯夭矯山斯嵯峨生
鄙善之絕域邈流沙而迅過日三百猶跬步輕千斤之
負馱方炎風之煽毒劇殲人於札瘥爾乃即沙滅口警
候匪譌度磧渴水口塵莫去迹踴而鑿涓涓盈科其或
脩程阻艱芻秣罔繼洩麪茹銜糾纏堅閉浹辰無饑萬

里不噴校地用之凡獸茲實氣稟之尤異者也蹠不介
甲踣鐵其堅肉鞍喂𪔐雙峯矗聯復有傑出一峯巋然
力倍恒品直當萬千其穹莫扳抑之即從弭耳伏地屈
足漏空累乘駢坐奚婢塞童曳繩掣鼻自西自東昂首
噴穢呼圓生風翠釜之珍其忍取供流潼甘馥馬酒釀
醲墮毳紉緝褐被域中風土既習字育日豐板襴其雛
稚紫茸茸冶銅象形僅得其槩亦不嫵媚劉文適類景
純著贊論功遺大歷唐及宋紀述未備皇元御天西北

首賓天竺效貢泉渠空羣魚魚連連列廡雲屯千乘萬
騎灤水歲巡負鼓先聲服箱後塵背錦糶糊絡珠璘霽
鈴鐸殷地旌旃盪雲開闢而下有國之有馳者未有若
我朝之殷也牧索分職秩浮令丞負重致遠人知其能
有知其出拔之奇搏擊之精者乎苑草未凋風日清美
九重機暇鳳輦蒞止俯察品彙縱觀物理虎賁執纆兩
兩相睨騰蹙傾奔若欵徙倚待怒氣之既盈俄侵凌之
漸邇脫羈發縱勢邁角觝始齧頸而躑躅復摩肩如委

靡乍分立以卬隙遽挑釁於駉駉飄忽若風燕盤旋如
磨蟻劃然踴躍人立對起波瀾土墳雷轟電駛持久跼
跼勝負未決貂璫聲援陞楯皆裂餘勇雖鼓虛驕已竭
嗟兩雄之相戾卒不遑乎一蹶勝者植立揚揚自慊主
矜調擾望拜楚躡天為噤噓賜沓繒帛嘗聞單于祭三
龍祠以是為樂龜茲觀七日戲以占耗息今始得以驗
其說鄙哉季邱芥金其鷄杜鄩走馬時在側微開元南
面何取於斯顧羽毛之瑣瑣瀆黼宸之巍巍而登床之

舞馬亦不過示異於宴嬉又孰若大逾犀兕猛軋虎羆
可以鼓吹飛之士激羽林之孤者哉小臣在列顧瞻震
栗悸定而懾氣塞而釋目隘而豁足痿而力歸來人間
塵土全集袋馴白唐籠閑促織黃雀山鷓種種有敵下
里何知小兒方劇觀於海者難為水曾何辱乎目擊然
臣有芻蕘之言增渤澥以涓滴大小雖殊玩物則一惟
吾皇遊六藝之圃徵勝負於往昔愚臣一第非手搏而
得視試卞為期門之徒亦粗可以備顧問而陳得失也

三臺賦

至正三年九月二十四日有壬偕明初馬徵君遊三臺
明初有長句既次其韻永歌不足又作是賦其詞曰

歲癸未秋九月霜清寒薄天宇澄澈塗無長泥庭有積
葉高陽子逸興作呻畢輟趣膏秣事登涉壺清露之芳
醞從白眉之佳客乃渡清洹稅駕乎鄴覽山川之形勝
弔陳迹之未滅客乃指顧而告曰子亦見夫三山之巖
薛者乎永井峙北金虎距南銅爵巖巖中立而三若稽

作者振古所慙欲祛我銜不能縷談子亦欲聞其凡乎
高陽子曰嘻昔有塗巷話古事及漢季小兒聞曹敗則
大喜劉蹶則顰蹙而出涕蓋人心天理之所同况怒其
人而履其地因其跡而聲其罪不亦宜哉客乃言曰吉
利之生姓不自知由嵩已冒夏侯何稽舞戟禦捕啖葛
如飴誑叔以疾拒客以泥睥睨一世岸然肆欺雖橋何
之見異卒莫逃子將之譏謂興義以寧國致群材之景
隨爾乃劫遷乘輿地尊天卑彛倫攸斁大厦以隳及乎

素尚既敗審配亦摧黃星斯應赤精遂微入鄴領冀州
之牧中天植不臣之基慮幾人之稱王乃居之而不疑
幾簣幾杵成茲崔嵬子午梁貫愈出愈奇三山鼇戴雙
闕鳳飛連薨複道相為蔽虧累棟山積周軒雲齊陽宮
冬熙凌室夏淒審曲面勢有巧無遺衡漳浩浩乎其北
隆慮靡靡乎其西收千里於寸眸萃萬景於一時卷山
河而匪席指風霆其在頤應劉王徐倡酬諏咨登高能
賦家有陳思父子放志欲長若斯天道惡盈樂極則悲

撫冲弱之季豹顧婉孌之蛾眉語託人而哽塞惟泣血
之漣沔痛富貴之長違遽盡露其情狀彼一床之八尺
容幾許之總帳要脯糒於朝晡競聲樂於朔望分香衣
而造履組舉瑣瑣於屬續其橫梁賦詩之雄發壁弑后
之威奄忽而俱喪匪不及乎篡代丕蓋默定於主鬻鎖
諸妓於幽闌望西陵之莽蒼念舊寵而興悲抑茹怨而
自愴霜雁訴秋露花泣春宰木行拱几筵有塵哀絃急
管其聞不聞事往跡存如惡不泯夫以精舍二十年

之規欲媒孽萬年之為君不知司馬家兒已瞠乎其側而恥於附其翼攀其鱗也徒為趙燕魏齊之張本因之增多重困乎吾民幸疊障之不鏟俾表惡於無垠今吾與子效小兒之顰蹙申欺孤之公議傾壺中之清醇澆胸次之醜磊且以醉漢室征西之將軍魏家創業之武帝子以為何如高陽子聞而笑曰瞞乎瞞乎如客之言則爾之罪窮天地亘萬世而不可貫矣然誅則以心論言不以人廢乃歌其歌曰對酒當歌人生幾何憂思難

忘惟有杜康於是引滿竭壺興盡而返回望三臺渺蒼
茫乎醉眼

主塘小藁卷一

欽定四庫全書薈要卷一萬六千三百十二

集部

圭塘小藁卷二

元 許有壬 撰

古詩

神山避暑晚行田間用陶淵明平疇交遠風良
苗亦懷新為韻 十首

田塍晚獨策及此時雨晴東畦與西疇泱泱流水聲豐
年已足歡清風復多情歸來藉草坐濁酒還自傾不用

澆醜磊我懷無不平

寢迹非絕世雅志便林丘青山足一至勝處靡不遊意
適輒忘返茲焉夏已秋遙遙目力窮青青盡田疇迷復
幸不遠歸歟無異謀

脫身豪俠窟里氓締新交愛其心無弃不較醉語謔生
兒更有教治地盡肥壤禾黍已在眼瓜蔬早登庖愧子
良已多况敢希由巢

浮生苦無悰道近人自遠重外樂徇身遺世幾赫咍老

農初不知遑遑歲年晚清晨負耒出日夕行歌返悠悠
千載心它人莫予忖

落日照我影頽然溪水中涼飈動絺衣勢欲凌虛空顧
之一大笑與爾將無同昔也爾何達茲焉爾何窮莫道
山林陋乃有黃虞風

昔人植松栢映蔚彌崇岡不為朝夕利千載當自長植
槿非不榮我圃因之荒白髮走畏途途脩馬非良桑榆
賴非晚此樂且無央

靜念少日事躁中劇握苗欲令千載淳反之在一朝斥
鷃不自量上欲搏扶搖世怒任盲俗林譏愧清謠傲骨
日已長及辰事逍遙

淵明昔歸休開歲纔五十我雖年近似我道慙什百兼
金與尺璧敢取儕瓦礫緬焉動真想迅往孰誘亦庶幾
歸田園千載可同迹

我聞昔桃源民風近無懷茲山亦深窈中有讀書齋但
絕車馬迹不惜雲煙埋旁圍靡靡山上蔭高高槐聊以

永今朝得酒從無媿

我髮日以變山色日已新
舉杯試問山古今
閱幾人我非山主人
聊為山之賓
杖可入幽險
詩能寫清淳
但恐我它適
山乎誰與鄰

謝吳閑閑大宗師寄鶴氅衣

逆駢欲遺世異服事繆悠恭也差可觀
未是真仙儔因服究其衷有懷小竹樓
一時示蕭散千載瞻風流鄙人冒朱紫
因循成白頭衣錦不尚絢褫帶宜承羞
歸來作

褐父敝縕寒無憂老仙獨不棄謂可同真修解衣遠衣
我意重千金裘高義固多感濁骨難負丘披之焚香坐
世慮忘囂湫神仙未能學願學王黃州

陳芝田寫余真對之小酌戲成四韻

今日我與汝相看各花顛亟呼尊酒至我飲汝茫然它
年我長往酒但酬汝前悟此一大笑沽酒休論錢

和林春野見寄韻

二首

山中真可樂經旬無客來群材足梗楠小臣甘草萊君

看倦飛鳥投林不徐徊咄爾迷途人
張張自紆回海鷗
久已狎鷗鷺復何猜秋風看木落
春風看花開既種子
猷竹亦有逋仙梅先生可休矣大夫亦賢哉高步雲漢
閣蹒跚距能陪尚可學采藥談笑到天台

又

士生如大木皆欲架明堂寧知施用處用圓吾乃方歸
來何所事琢句數腎腸既為烟霞痼復作花月荒一壑
今已專萬景身可當山空白石爛雲盡青天長故人遠

相慰瑰辭聯夜光一展發曄曄再誦鏗琅琅貞松無冶
容老桂多古香三復如見君歲晚誰能忘

宿臨湘贈誠之監縣

北風櫓聲乾晚泊斷磯下雲岫浮脩蛾霜空入平埜鳴
鴈無處尋落日不可畫重岡護巖邑百里寄民社籍甚
賢大夫居然魯恭化豐年足粳稻沃壤滿桑柘我如無
心雲底事勞候迂爛醉得詩歸江山非傳舍

李伯徵中丞奉東宮命作椎結請紀其故以百

字頌而祝之

總角習義方結髮事明主櫛縱多且貂勤勞幾寒暑青
皇一顧中遂與國人伍區別垂鬢雲岐分戢鴉羽昔我
秋谷公爬搔淨寰宇象賢實無愧冠服儼前矩願言壽
而康三握勿為苦它年麟閣上雪鬢照簪組何用拭肝
石道貴隨所處老我任飛蓬歌詩美繩武

次韻可行記圭塘草木

八首

吾家青牛君伯仲龍矯矯不似丁令威暫來立華表鬼

神護斧斤風霜幾昏曉摩挲左紐文曾見陸為沼

又

徂徠以多賤吾圃斯拔萃遠從它山移清與幽境會樂
天才四十裁爾已興慨吾年六十三方期翠成蓋

又

長公有名言不可居無竹僕僕斲蒼苔森森植寒玉聲
來書幌清陰入酒杯綠何須更晚食此君足當肉

又

蒼官昔多事乃與群鳥鄰假如在圭塘亦勝居神困老
根已作石霜皮不成鱗不用歎不遇叅軍能寫真

又

朝來花斬新暮雨墜紅濕藤蘿助奇觀羅帔層層碧昌
黎性苦隘政爾要蒙幕一笑問秋乎還能誨人奕

又

披披青羅扇敷陰圭塘阿夏窓雲影薄秋枕雨聲多翰
墨聊復爾風霜其若何休教近湖石掩映美人歌

又

人生念慈親當階多樹萱忽隨靈椿化冥漠俱高騫此
憂詎可忘肝摧不能言對花差自慰白頭還抱孫

又

昔人避秦亂川原多種桃我幸遇明世栽培胡自勞看
花食其實為圃豈不遭踈懶強鞭策猶勝宅不毛

寄歸彥溫

林慮吾郡山棄之來浚都子實浚都人乃得居林慮出

疆必載質浮海或乘桴聖賢義有在并介遂殊途靜言
復自咎九徵有不渝素閎築土室苑粲安一車六月擁
裘卧異世真同符何當雲壑裏添我一茅廬

歌行

應制天馬歌

臣聞聖元水德正色在朔方物產雄偉馬最良川原飲
齧幾萬萬不以數計以谷量承平雲布十二閑華山百
草春風香又聞有駿在西極權奇倣儻鍾乾剛茂陵千

金不能致直以兵戈勞廣利當時紀述雖有歌侈心一
啟何由制吾皇慎德邁前古不寶遠物物自至佛郎國
在月窟西八尺真龍入維繫七逾大海四閱年灤京今
日才朝天不煩翦拂光奪目正色呈瑞符吾玄鳳鬐龍
臆渴烏首四蹄玉後鑿其前九重喜見遠人格一時便
勅良工傳玉鞭錦韉黃金勒瞬息殊恩備華飾天成異
質難自藏志在君知不在物方今天下有道時絕塵詎
敢稱其力臣才罷駑亦自知共服安輿無泛軼

題友人所藏明妃圖

臂香骨沁守宮虐金鎖重門怨銀鑰深宮有眼不識春
畫長時聽雲間樂平生所見惟監宮今朝豈期見畫工
君王知畫不知妾薄命已分如秋蓬黃沙漫漫天無窮
驚飈吹老紅芙蓉穹廬明日又何處此生遂負南歸鴻
和親納侮號上策建議詒謀婁敬責妾身雖苦免主憂
猶勝專寵亡人國關山寥落夢亦迷嫁雞正爾隨雞飛
人間生女莫望貴只可近作田家妻琵琶聲斷霜天月

青塚至今青不歇後來却有蔡文姬千古胡笳辱哀拍
行建德縣民有訴作橋罹害者作徒扛行

霜餘溪湍息奔鬪農隙維時梁可構往來恐有病涉人
官著恒規誰敢後邑胥承帖來鄉里鄉民見胥如見鬼
督材斬木到丘壟致期視成毆婦子人未安行力已疲
冬無旨蓄雞先死田家雞盡誠可哀邑宰旦夕行橋來
吁嗟此役本為利誰知為害翻百倍老癯偃僂訴且泣
莫遣吏監民自力治貪問瘼乃吾事去甚痛懲尤所急

老癯又言官試聽今日所知百無一我聞此語憤填膺
不可勝誅空太息安得落落窠區間盡是龔黃二千石
臨江見大船宏麗異其賦賈客樂

鼓聲震蕩馮夷宮帆腹吞飽江天風長年望雲坐長嘯
穩駕萬斛凌虛空主人揚州賣鹽叟重樓丹青照窓牖
斗帳香凝畫閣深紅日滿江猶病酒錢塘女兒靜且姝
臂金盈尺衣六銖憑闌飯飽觀戲魚清波照影紅芙蓉
江城到處時弥楫徧買甘鮮窮所悅千里携家任去留

一生為客無離別
敦農抑商昧遠計
遂使素封輕得意
握籌狡僇俯承命
危坐咄嗟收厚利
田廬彫弊君知否
終歲勤勞莫糊口
夏稅未了秋稅來
三十六策惟有走
喜逢口

灤陽驛東北四十里有雙塚世傳昔有久戍不歸者其
父求之適相遇此山下相抱大笑喜極而死遂葬於是
俗因謂之喜逢口亦猶望夫之有石也雖莫究其世代姓
氏而其言有足感人者故作是以紀之

兒寒解衣重撫摩兒饑推食孰忍訶長成與國遠負戈
一去不返當如何去時云戍東北鄙直出榆關度遼水
白頭郎罷與影俱豈憚山川千萬里天教此地適相逢
父曰從天墜吾子笑疲樂極俱殞身誰謂情鍾遽如此
官家開邊方未已同生又別寧同死山雲漠漠風颼颼
山頭雙塚知幾秋當時不忍一朝喜今日翻飛千載愁
猶勝貞女化為石終古孤身雙不得清江寒影日悠悠
行人一去無消息

赤壁

孽瞞禍水劇趙女漢火餘光能幾許蜀方傳薪噓未然
吳偶束縕成一炬萬艘枯葦沃以膏空江如鞞長風鼓
九淵鼎沸羹魚龍連營熾炭燔貔虎雄圖南紀成畫餅
匹馬華容作窮鼠坡翁乘興賦赤壁爛漫天機湧毫楮
偶從雪裏寫芭蕉又似驪黃不毛舉考圖求故此其地
疾惡千年若躬睹江山蕭條歲華晚興廢人間幾今古
買魚沽酒弔阿瞞醉和漁歌短蓑舞

雪蓬歌贈廖楚材山長

人間塵土何地無道人自愛居江湖江湖佳處寫不盡
且復想像陳其脩有舟如葉君勿笑氣象乃欲吞堪輿
四時風景皆可樂歲晚獨與天游俱青山昨夜忽遁去
萬象一色涵水壺眼界疑墮清虛府心境直造鴻荒初
道人箕踞受竒供但訝光恠生蘧篨霜筠露籜政不俗
更欲緣飾為瓊琚湘江清碧俯見底嶽麓倒影寒縈紆
興來不省有物我短蓑獨速歌吳飲可憐翠被秦復陶

但鼓憂患來攻毆莫言雪盡蓬遂廢敲雨承月仍相娛

哀棄兒

雪霜載途風裂肌有兒鶉結行且啼問兒何事乃爾悲
父母棄之前欲追木皮食盡歲又饑夫婦行乞甘流離
負兒遠道力已疲勢難俱生灼可推與其蠹尾莫我隨
不如忍割從所之今夕曠野兒安歸明朝道殣非兒誰
父兮母兮豈不慈天倫遽絕天實為十年執政雖咸腓
發廩有議常堅持昔聞而今見之倉皇援手無所施

兒行不顧寒日西哭聲已遠猶依稀

偶閱可行書見其印章曰洹溪釣者戲為野語
道士只合山中居釣者只合溪中漁不山不溪朝市趨
人輕爾厭重爾誣彼道士者尤迂愚妄欲躋世為唐虞
平生動為鬼揶揄况負且乘招而呼山耶溪耶盍歸歟
山有美茹溪有魚

李惟中學士自西臺侍御召入以未央宮瓦硯
為貺作此謝之

漢家作宮法紫微金鋪玉戶明華棖甄官陶瓦極能事
鉛丹細擣咸陽泥一朝神雀去不返秋風禾黍驚離離
谷陵且變此宜盡一二時出農夫犁人間購求作珍玩
洗刷篆籀分毫釐西臺執法好事者磨磨為硯尤瑰奇
體呈全璧徑尺許沼開新月才一眉堅如鐵石潤如玉
墨聲瑟瑟松風吹惠然匣送感高義但惜所與非所宜
公才真是謫仙裔善事利器方相資嗟予蕪學忝詞館
雖有此器無能為世傳銅雀亦佳品搜剗黃壤金無遺

高皇垂統四百載老瞞何物敢等夷愛人屋上烏亦好
况茲適用逾端溪楮生毛穎賀得友坐令几案增光輝
代言揮制固多愧玉堂風月猶能詩

中書久病得請將歸吳閶闕大宗師亦有疾以
其象為贈云代彼陪行焚香對之作此以謝

宵人本是山澤臞涉世政坐饑寒毆五年黃閣事何補
種作老病叢孱軀灤京歸來十浹日藥裹不可離須臾
平生結客半寰宇未免操瑟從齊竽可人底事期不來

承慶堂深誰敢呼邇來亦復詩作崇清減益見風標孤
杜門却掃難折簡豈意惠然來畫圖相看一笑但臆對
妙契未許卮言斟清水寒玉照林表和氣春風生座隅
齋居頓覺俗氛遠高致已逼沉疴蘇我方歸思劇迅矢
公自有分居方壺過從此去計必少夢中道路多縈紆
便當卷奉江湖去願得始終如蜃驢

小樓對閑閑宗師象因次舊韻寄之

鼎食不解肥我臞多病亦為山林毆巾車孤舟任所適

何往不可容微軀莫言五十未為老縱有七十來須臾
今年兩耳得差勝飽聽萬籟吹笙竽閒人多事迫詩債
野老敗興時招呼小樓今日好風色目斷天末冥鴻孤
一時幽興豈容負況對蓬島神仙圖篆煙凝坐共心賞
盡醉更把空尊斟懷人未免有芥蒂處世已覺無廉隅
分江小鼎煮粟粒誅茅別墅營屠蘇遠山但藉一枝杖
中流誰辨千金壺菊籬秋香晚未減松窓月色寒相紆
我行不武分歛迹安得甘草資蛩驢



圭塘小藁卷二